

nanpa suwi

jan pali

jan Alonola + jan Kasape + jan Ke Tami
li toki.

jan Alonola + jan Kasape + jan Ke Tami
li alasa e pakala.

jan Alonola + jan Ke Tami li sitelen.

jan Simo li sitelen e sitelen sinpin.

jan Kasape li sijelo e lipu.

jan Alonola + jan Kasape + jan Sonatan
li lawa e kulupu.

jo

pilin 3 toki lili nanpa wan

musi 3 toki nanpa tu
li suli ete

3 toki ni li suli a
li jo e supa
pi mute ali

sona 3 toki ni
li lon kulupu kama

ö o kama pona

lon lipu tenpo ni!
mi mu e mu lili
lon open ona:
mu, mu mu mu.

taso mu ni taso ala
li lon! o lukin
e insa pi lipu tenpo ni.
jan mute ante
li mu anu toki.

ni la o musi pona
kepeken lipu tenpo!

– jan Sonatan



lipu ni li tan kulupu
lipu tenpo e.V. ·

kulupu ni li lon ma Aken ·
ona li lon ma Tosi ·

mi pana e lipu ni
lon tenpo nanpa 2026 ·

toki pona li nimi ala anu seme?



tan kala Asi

sitelen li tan jan sitelen

→ **toki mute li lon ma.** mi wile toki e toki la mi kepeken nimi ona. mi pana e nimi Toki e nimi Inli la sina sona e ni: mi toki e toki Inli e toki ante ala. nimi Inli en nimi Tosi en nimi Kanse en nimi Sonko en nimi ante mute li ken e nasin ni. taso toki pona la seme? toki mute li pona tawa mi. ona ale li toki pona anu seme? nasin seme la mi o toki e toki pona wan taso?

ni li nasa tawa jan mute. “nimi ala li pana e toki pona! pakala suli a! toki pona o nimi.” ona li ante lili e toki ona. mi toki pona la ona li toki Toki Pona. anu la ona li toki Pona. anu la ona li toki Tokipona. mi la nasa ike. toki Inli la nimi **Toki Pona** li lon li pana e toki wan taso. toki pona la ala. ni li nasa anu seme?

mi la nasa ala a! tenpo mute la ijo li suli tawa kulupu la ijo ni li jo ala e nimi. o lukin e lipu pi ma ale. ma Apika la ma seli suli

li lon. toki Inli la nimi ona li ma Sawala. toki Alapi la seme? toki Alapi la nimi Sawala li toki e ma seli. taso ma seli ale a li kepeken nimi Sawala! toki Alapi la ma Sawala li **ma seli suli**. nimi ala li toki e ma Sawala taso.

o lukin kin e ma Oseja. ma Oseja la kulupu Mulinpata li lon. kulupu Mulinpata li toki Inli li toki Mulinpata. nimi Mulinpata li pana e toki wan taso lon toki Mulinpata anu seme? ala. nimi Mulin li nimi Toki lon toki ona. nimi Pata li nimi Pona. ni la ona la toki ona li **toki pona**. sama kulupu mi a.

sina kama sona e ni: nasa ni li kama lon toki ante. ni li ike ala tawa kulupu ona. taso toki pona la mi o seme? ken la tenpo la mi wile toki e ike pi toki mi. taso nimi ona li toki pona. mi toki e **ike pi toki pona** la ni li nasa wawa tawa jan kute. nasin seme la mi ken tu e kon pi toki pona (ale) e kon pi toki pona (ni taso)?

o lukin e toki mi. toki Inli la ni li **Toki Pona**. taso mi la ni li toki mi a. kin la ona li toki lon sitelen ni. kin la ona li toki pi lipu tenpo. sina lukin e toki mi la sina sona. mi toki e toki wan taso. nasin pona. **I**

ma lili lon ma suli Elopa nanpa tu

tan jan toki
sitelen li tan jan sitelen

tenpo pini la mi toki e ma Wasikano e ma Monako e ma Samalino. ona li ma lawa pi lili mute lon ma suli Elopa. tenpo ni la, mi wile toki e ma Lisensan e ma Mata. ona li ma pi lili mute kin. o kama sona e pona ona.

ma Lisensan

ma Elopa la ma Lisensan li ma lawa pi lili nanpa tu tu. ona li jo e nena suli mute. ona li lon ala poka pi telo suli. ma taso li lon poka ona. ma lawa pi poka ona kin li lon ala poka pi telo suli. ma ale la ma lawa ante wan taso li sama.

ma tomo Watu li lawa e ma Lisensan. tomo pi jan lawa li lon poka ona. tenpo suno luka luka lon mun luka tu wan li sewi e ma. tenpo ni la jan ale li ken kama tawa ma kasi lon poka tomo pi jan lawa. ona li ken kute e jan lawa li ken moku e telo nasa lili. ni li wile e lipu taso e mani ala. tenpo pimeja la jan li pana e suno wawa pi kule mute tawa sewi.

ma Lisensan li ma pi esun wawa. nasa la, sitelen pi tomo mani pi ma Lisensan li sama sitelen pona 'tu sina' tawa lukin!

ma Mata

ma Elopa la ma Mata li ma pi lili nanpa luka. telo li sike e ona. suno en tawa telo




li pona tawa sina la ma ni li pona mute tawa sina!

sike suno MMMMLA pini la jan open li kama lon ma ni. jan li pali e tomo kiwen pi suli mute. tenpo ni la, tomo ni li majuna mute, taso ona li awen lon a!

tenpo pini la, ma Mata li jo e waso walo pi suli mute (*Cygnus falconeri*) e soweli pi lili mute pi nena linja (*Palaeoloxodon falconeri*) e soweli ante mute. ike la, ona ale li moli. taso sina awen ken lukin e kiwen ona li ken kama sona e ona lon lupa Atalan (*Ghar Dalam*).

ma tomo Waleta li lawa e ma Mata. sina ken kama sona e kalama musi e moku pi ma Mata lon ni lon ma tomo ante kin. mi la pan Pasi (*pastizz*) li pona mute: kili anu kiwen pi telo soweli li lon ona. taso moku ante mute li lon kin.

ma seme li pona tawa sina?



kasi palisa loje

tan jan Satasetoki
sitelen li tan jan sitelen

ma ale la kasi mute li lon. kasi kule li pona tawa lukin. kasi pan li pana e moku. kasi telo li lon noka pi telo suli. kasi kiki¹ li awen e telo lon ma seli. kasi anpa li len e selo ma. taso kasi ni ale la kasi palisa lon ma Kaliponja li suli mute. ona li sewi. ona li awen lon tenpo suli. nimi ona li "kasi palisa loje."

kasi palisa loje (toki Lasina: Sequoia sempervirens) li kasi pi sewi nanpa wan lon ma ale. ona li ken sewi sama tomo palisa pi supa mute luka luka luka. taso kasi palisa loje li lon ma lili taso lon poka pi telo Pasipi lon ma Kaliponja. ni li tan seme?

ma Kaliponja la kon telo li lon. ni li pona tawa kasi palisa loje. sina tawa ma tomo Sanpansiko la sina ken lukin e kon telo walo suli. ona li kama tan seme? nanpa wan la telo Pasipi li lete. telo lete li kama tan ma Alaka li lete e telo noka. tenpo seli la kon tawa li tawa e telo selo. ni la telo lete li kama sewi li lete e selo pi telo Pasipi. nanpa tu la kon tawa seli li kama. kon ni li tawa poka sewi pi telo lete. tan ni la ona li kama lete. telo lon kon ni li kulupu li kama sike telo lili. ni li kon telo. ona li lete; taso kon pi poka sewi li seli. ni la kon seli li poki e kon telo lon poka pi selo ma. tan ni la kon telo mute li lon poka telo pi ma Kaliponja. taso tan seme la kon telo ni li suli tawa kasi palisa loje?

kasi palisa loje li wile suli e telo. lon la kasi ale li wile e telo. linja pi noka kasi li lanpan e telo tan ma. telo ni li tawa lon insa sijelo kasi tawa lipu. pini la lipu kasi li pali e wawa kepeken telo, kepeken suno, kepeken kon. kasi ale li wile e wawa ni tawa kama suli. ni la telo li suli mute tawa suli pi kasi ale. taso kasi li kama sewi la lipu li kama weka tan linja noka. ni la telo li ken ala tawa lipu. ike! kasi palisa loje li ante. ona li lanpan e telo tan kon. kasi pi mute lili li ken ni. seme la kasi palisa loje li kepeken telo kon?

kasi palisa loje li moku e telo tan kon kepeken nasin tu wan. nanpa wan la ona li jo e "lipu telo." mute la lipu kasi li pali e wawa kepeken suno. kasi palisa loje li jo e lipu ni. taso ona li jo e lipu ante kin. lipu ante ni li pali e wawa lili li lanpan e telo mute. tan ni la ona li lipu telo. nanpa tu la, selo kin pi kasi palisa loje li ken lanpan e telo. kasi ale la telo li ken tawa lon insa sijelo. taso kasi mute la telo li ken ala tawa insa tan selo. ante la selo pi kasi palisa loje li ken tawa e telo. telo li lon selo la ona li ken tawa insa. wawa! nanpa tu wan la kon telo li tawa anpa. kon telo li kama lon kasi palisa loje la ona li kulupu. telo ni li kama anpa tawa supa ma. linja noka pi kasi palisa loje li ken lanpan e telo ni. kama la telo ni li tawa lon insa sijelo kasi tawa lipu suno.

ale la tenpo li tawa; taso kasi li awen. ona li awen lon seli lon lete, lon suno lon telo, lon open lon pini. suli nanpa wan la kasi palisa loje li awen lon kon telo pi ma Kaliponja.

¹ kiki la selo kasi li jo e palisa lili. ijo li luka e palisa la palisa li pakala e ona.

sijelo li ken ala lawa pona e suwi la

tan kon Okisen

sitelen li tan jan Alonola

→ **sina moku la, sijelo sina li kama wawa tan suwi moku.** tawa ni la, sijelo o lawa e suwi sijelo kepeken ijo. nasin sijelo pi pakala moku la, insa wan li pali e ijo ni. insa ni li lawa e mute suwi lon telo loje, li pana e ijo mute tawa telo loje. tenpo mute la, ale li pona. taso, tenpo la, insa ni li pakala. jan sona li sona pona ala e tan pi pakala ni.

kule tu

pakala pi insa ni la, kule suli tu li lon. kule nanpa tu la, insa li pali mute li kama wawa ala. tenpo mute la, jan li lon kulupu ni la, jan pi kulupu mama ona kin li sama ni. kin, tenpo mute la, insa ni jan li pakala la, kule li nanpa tu. (kulupu pi pakala ni li lon la, jan luka tu tu li kule nanpa tu; jan wan li kule nanpa wan).

pakala insa pi kule nanpa wan li seme? sijelo li utala e jaki. taso tenpo mute la, ike la, sijelo li utala pakala e sijelo li pakala e ona. sijelo li utala e insa pi lawa suwi la, kule nanpa wan li lon. mi lon kulupu ni. mi lili la, insa ni li pakala.

mute la, pakala insa li sama kule nanpa tu. insa li ken ala pali mute e ijo pi lawa suwi. taso, mute la, ona li sama ala. tenpo mute la, kule nanpa tu li kama lon tenpo pi suli jan. tenpo mute la, kule nanpa wan li kama lon tenpo pi lili jan anu suli lili. kin, kule


nanpa tu la, insa li awen pali lili e ijo lawa. kule nanpa wan la, insa li pali ala e ijo ni. jan pi kule nanpa wan li wile kama jo e ijo lawa tan misikeke lon tenpo ale. tenpo la, kulupu pi kule nanpa tu li ken kepeken misikeke ante tawa lawa pi suwi sijelo.

ijo lawa

tenpo pini la, jan li kule nanpa wan la, ale la, jan li moli. ken la, ona li awen lon sike wan anu sike tu li pilin ike li ken ala moku mute. taso, lon tenpo sike nanpa luka luka luka tu tu ale mute wan (1921) la, jan Petewi Pansin (Frederick Banting) en jan ante li kama sona e nasin tawa ni: jan li ken kama jo e ijo lawa tan insa soweli. ona li pana e ijo tawa jan pi kule nanpa wan la, ona li moli ala. ni li pona mute a!

taso, tenpo mute la, jaki li lon ijo ni soweli. jan li sona pona ala e ni: ona li ken kama jo e ijo ni tan insa soweli kepeken seme? jaki la, jan li pana e ijo tawa jan pi kule nanpa wan la, sijelo ona li pilin ike li ken kama moli. ni li ike. kepeken sike mute la, sona li kama pona lon nasin pi kama jo. taso, nasin pi pona mute li kama.

sike nanpa luka luka luka tu tu ale mute mute mute luka luka luka tu wan (1978) la, jan sona li pali e ijo ni kepeken ijo jaki pi lili mute. ijo jaki ni li lon insa moku pi sijelo ale. kepeken nasin ni la, jan li ken kama jo e ijo ni pi mute suli kepeken pali lili. kin, ona li jaki ala li sama ijo ni tan insa jan. ni la, sijelo pi jan pi kule nanpa wan li kama ala pilin ike. taso, jan ni li wile awen pona la, ona o awen pana e ijo ni kepeken palisa lili tawa telo sijelo ona lon tenpo moku ale. ni li pali mute.



ilo sin

tenpo poka la, ilo pana ante li kama lon. ilo ni li awen e telo lon ona lon suno tu wan li awen pana e telo lili tawa sijelo lon tenpo ale. ni la, mute pi telo ni li ken ante lon tenpo ante. jan li ken lawa pona e suwi ona li wile ala kepeken palisa lili mute lon tenpo moku ale.

kin, tenpo pini la, ona li wile sona e mute suwi lon telo sijelo lon tenpo ale la, ona li wile pana e telo jelo jaki lon lipu. ni la, ona li sona lili e suwi ona. taso nasin sin li kama lon. nasin ni la, jan li ken kepeken telo loje li ken sona pona e mute suwi ona. nasin ni li wawa.

tenpo kama la, nasin pi wawa mute li kama lon. ni li ilo pi sona suwi pi tenpo ale (ilo CGM). tenpo suli ala la, ilo ni li lon. taso, mi ale pi pakala ni la, ona li ante mute e lon. kepeken ilo ni la, jan li ken lukin e mute suwi ona lon tenpo ale kepeken ala telo loje ona. ona li ken pana e sona ni tawa jan misikeke ona tawa kulupu poka ona. suwi sijelo li kama lili la, jan li ken sona e ni tan ilo li ken suli e suwi kepeken moku suwi. suwi sijelo li kama mute ike la, jan li ken sona e ni kin tan ilo li ken lili e suwi kepeken ijo pi lawa suwi. tenpo pini la, jan li ken sona e suwi sijelo tan pilin anu ilo pi telo loje taso.

tenpo poka la, ilo pana en ilo pi sona suwi li ken ala toki. ni la, jan o pali mute. taso, ilo sin li kama lon li kepeken nasin kon "laso" pi toki ilo (nasin Bluetooth). ilo ni li sona e suwi tan ilo pi sona suwi li toki e ni tawa ilo pana: o ante e pana sina. ni la, ilo li lawa pona e suwi sijelo. kulupu esun li pana ala e ilo ni. jan pi kule nanpa wan en jan poka ona li pali e ilo ni. mi kepeken ilo toki ni. ona li pona mute tawa mi li lili e pali mi li lawa pona e suwi mi. tenpo ni la, esun mute li pali e ilo sama ni. ni la, jan mute li ken kepeken ilo sama ni. taso, mi awen kepeken ilo pi esun ala.

mani mute

ijo ale ni li pona, taso, ijo ike li awen lon tenpo poka. esun pi sona sijelo li pana e ijo ni e ilo ni la, ma Mewika la, tenpo suli la, ona li wile e mani pi mute wawa. tenpo la, jan li moli tan ni: ona li ken ala esun e ijo ni. ni li ken sama tenpo pini weka, lon tenpo pi ijo ni ala. tenpo la, ona li kepeken ijo pi pona lili, ni li lili ike e suwi ona. ante la, ona li kepeken ala ijo ni la, suwi ona li awen mute ike la, sijelo ona li kama pakala. ma mute la, lipu lawa li toki e ni: ijo ni o wile ala e mani mute. ijo ni li suli tawa sijelo. tenpo poka la, lawa pi ma Mewika li toki e ni kin. ni li pona mute a! taso, ijo mute li awen wile e mani mute lon kule nanpa wan.

mi toki e ijo mute, taso ijo mute ante li lon. mi wile e ni: ale pi kule ale li pilin pona li wile ala e mani mute tawa moli ala. **I**

kalama musi uta lape Taketa

**tan jan Ulansisu
sitelen li tan jan sitelen**

pilin mi li ike lon ona
la musi Pon li lon
ko lete li tawa anpa
jan lili li kalama...

musi Pon li kama la
pona li seme?
mi jo ala e len suli
e len linja kin...

jan lili li kalama mute.
ona li ike e mi...
tenpo suno ale la,
mi kama jan palisa...

a! mi wile weka
tan tomo mute ni...
lon nena weka la mi lukin
e tomo pi mama mi.
lon nena weka la mi lukin
e tomo pi mama mi...

utala musi pi jan Akimete

tan soko Sijeni

sitelen li tan jan sitelen

ma Elena pi tenpo pini la, jan Akimete

li pana e sona mute; ona li sitelen e sona lon lipu la, mi pi tenpo ni li ken sona e ona. lipu wan la, ona li pana e sona musi ni. o kute:

o jo e kiwen supa suli wan; supa la poka tu tu pi suli sama o lon. o jo e kiwen supa lili mute; kulupu pi kiwen lili la ni taso o lon:

•kiwen luka luka wan la, poka tu wan o lon.

•kiwen tu la, poka tu tu o lon.

•kiwen wan la, poka luka o lon.

(poka ale o suli ante. o lukin e sitelen!)

sina wan e kiwen lili ale la, ona li ken lon kiwen suli. taso, sina wile wan e kiwen ale lon nasin pona ni la, sina utala! musi la, o alasa wan e kiwen ale lon supa. pini la ale o supa: kiwen o ken ala lon sewi pi kiwen ante. nasin mute mute a li ken! kin la, sina ken musi ante kepeken kiwen sama: sina nasin e kiwen lili la, ona li ken sama sitelen soweli, anu sitelen jan, anu sitelen tomo... anu sitelen ante. toki Elena la utala musi ni li kepeken nimi ' σ μάχ ' (Osomakijon).

musi ante pi nasin sama li tan ma Sonko pi tenpo pini. musi Sisopan () la o jo e ni taso lon kulupu pi kiwen lili:

•kiwen luka la poka tu wan pi suli sama o lon.


•kiwen wan la poka tu tu pi suli sama o lon.

•kiwen wan la poka tu tu pi suli sama ala o lon.

utala li lili lon musi ni. taso, sama la, sina ken pali e sitelen mute kepeken kiwen lili. o musi pona!

musi lipu pi meli pimeja

tan **jan Esuwa**
sitelen li tan **jan sitelen**



open

musi lipu pi meli pimeja (toki Inli la “Black Lady”) la, sina wile kama ala jo e lipu tan supa! tan seme? sina wile weka tan lipu pilin () tan lipu ilo pi meli lawa (Q) a! musi ni li lon nasin ilo Winto lon tenpo pini. nimi ante pi musi ni li musi lipu pilin (toki Inli la “Hearts”).

musi ni li kepeken lipu Kanse. lipu li jo e kule (kasi: , ilo: , pilin: , kiwen:) e nanpa (A, K, Q, J, 10, 9, 8, 7, 6, 5, 4, 3, 2). musi ni la, lipu pi jan musi (Joker) li lon ala. jan tu tu li musi li lon nasin sike lon supa. ona li wile kama jo e nanpa pi lili mute. jan li sitelen e nanpa lon lipu ante.

sike

open sike la, jan wan li nasa e lipu ale. ona li pana e lipu luka luka tu wan (13) tawa jan ale tawa ona sama. jan ale li pana e lipu tu wan tawa jan ante.

- sike nanpa wan (1) la, jan li pana tawa jan soto.

- sike nanpa tu (2) la, jan li pana tawa jan teje.

- sike nanpa tu wan (3) la, jan li pana tawa jan pi poka ante supa.

- sike nanpa tu tu (4) la, jan li pana ala.

- sike pana ni li awen sin lon sike kama.

jan pi lipu kasi nanpa tu (2) o open. ona o pana e lipu ni tawa supa. jan soto li pana e lipu pi kule sama. ona li jo ala e lipu ni la, ona li ken pana e kule ante. lipu li lon supa la, sona ona o len ala. jan ale li pana e lipu wan tawa supa la, sike lili li pini. jan li pana e lipu sewi la, ona li kama jo e lipu ale tan supa. taso, lipu sewi li seme?

- kule pi lipu sewi o sama kule open.

- lipu sewi li jo e nanpa suli. lipu nanpa A li suli mute. lipu nanpa 2 li lili mute.

jan li kama jo e lipu tan supa la, ona o open e sike kama.

open sike la, jan li ken ala open kepeken lipu pilin (). kule open li pilin ala la, jan li pana e lipu pilin la, jan li ken open kepeken lipu pilin. ni li kama lon la mi toki e ni: “pilin li pakala”. jan li jo e lipu pilin taso la, jan li ken open kepeken ona kin.

jan ale li jo ala e lipu lon luka la, sike li pini. jan li kama jo e lipu la, ona li lukin e ona li nanpa e lipu ona:

- lipu pilin () li pana e nanpa wan (1).

- lipu ilo pi meli lawa (Q) li pana e nanpa luka luka tu wan (13).

•jan wan li kama jo e nanpa mute luka wan (26) tan sike wan la, ona li kama jo e nanpa ni ala. ni la jan ale ante li kama jo e nanpa ni. tenpo ni li ken tan ni taso: jan wan li jo e lipu pilin ale e lipu ilo pi meli lawa. ni la mi toki e ni: “(mi) tawa mun”.

jan wan o sitelen e nanpa lon lipu. sike kama li open. musi li awen.

pini

jan li jo e nanpa ale (100) la, musi li pini.
jan li jo e nanpa pi anpa mute la, ona li kama wawa.

mute jan ante

jan tu anu jan tu wan anu jan tu tu li ken musi.

jan tu wan la musi li ante lili. lipu kasi nanpa tu (2) li lon ala. jan li jo e lipu kasi nanpa tu wan (3) la, ona o open. tenpo

ale la jan li jo e lipu pi mute sama lon open sike.

•jan tu la, ona li jo e lipu mute luka wan (26).


•jan tu wan la, ona li jo e lipu luka luka luka tu (17).

•jan tu tu la, ona li jo e lipu luka luka tu wan (13).

¹ Windows

² linja nimi lon lipu ni la, kon pi nimi “soto” li poka open

³ linja nimi lon lipu ni la, kon pi nimi “teje” li poka pini



kala toki



tan kala Asi **sitelen li tan jan sitelen**

→ *toki musi ni li tan toki Aja. jan Owane Tumunjan li pali e ona lon tenpo sike nanpa LLLTTALTW. jan mute li sona e toki ni tan sitelen musi. kulupu pali Amenpin li sitelen e toki ni kepeken toki Lusi lon tenpo sike LLLTTAMMMMTW. sitelen ona li pona nasa tawa jan mute. sina ken alasa e sitelen lon lipu Jutu. taso mi wile toki pona e toki pi jan Tumunjan. kin la mi ante lili e toki. toki pona la musi ni li pona.*

jan majuna li jo ala e mani. ona li kama pali lon kulupu. kulupu li alasa e kala. tenpo wan la ona li alasa e kala pona a! jan majuna li luka e kala li pilin: “a. sama jan la kala kin li ken pilin. pilin pona la, pilin ike la, kulupu mama la, kulupu poka la, ni ale li ken lon kala.”

jan majuna li pilin ike tawa kala. kala li toki tawa ona: “o kute! mi musi pona lon telo. jan alasa li jo ike e mi. mi weka la kulupu mama mi en kulupu poka mi li pilin ike. mi lon ala telo la mi kama moli. mi wile lon telo. mi wile musi lon ona. o sona e pilin mi. o weka e mi tawa telo.” kala li toki pi wawa ala. wawa kala li kama lili tan telo ala.

jan majuna li sona e pilin kala li weka e ona tawa telo. “o tawa, kala pona o. kulupu sina o pilin pona.”

kulupu pali li lukin e ni. “sina nasa, jan majuna o! sina pakala e pali mi. o weka! weka moku o moli e sina!”

jan majuna li weka. moku ala li lon. ona o seme? ona li sona ala.

jan majuna li tawa tomo la monsuta li kama lon poka. monsuta li toki tawa ona: “toki, jan majuna o! sina pilin ike tan seme? a, sina jo ala e moku e pali anu seme? o kute. mi pana e soweli pona tawa sina. soweli li pana e telo wawa. o moku pona e ona. o kepeken soweli mi lon tenpo sike tu wan. taso tenpo li pini la mi kama li wile sona e ijo. sina o alasa pana e sona. sina ken la soweli li awen soweli sina. ken ala la mi kama jo e soweli e sina kin. pona ala pona?”

jan majuna li pilin e ni: “a, esun ni li ike. taso mi esun ala la mi moku ala li moli. tenpo sike tu wan la soweli o pana pona e moku. tenpo li pini la mi anpa.” jan majuna en monsuta li esun.

tenpo sike tu wan li pini. jan majuna li moku pona e telo soweli li moli ala. taso pimeja la monsuta li kama. jan majuna li pilin ike: “seme li ken awen e mi tan monsuta?”

mije pona li kama lon tomo. jan majuna li sona ala e ona. mije li open: “toki! mi ken ala ken awen lon tomo sina lon pimeja ni? suno li kama la mi tawa.”

jan majuna li toki: “ken. taso o sona e ni: ike la mi en monsuta li esun. monsuta li pana e soweli. soweli ni la mi moku e telo li moli ala. taso monsuta o kama lon pimeja ni o toki. ona li alasa e sona mi. mi ken pana pona e sona la soweli li awen lon mi. mi ken ala la monsuta li kama jo e mi. mi sona ala e nasin pona pi toki sona. ken suli la monsuta li anpa e mi. wile mi la ona o anpa ala e sina kin!”

mije la: “ale o pona, jan majuna o.” mije li awen lon tomo.

pimeja li kama. jan majuna li kute e kalama suli. ijo li luka wawa e lupa tomo.

jan majuna la: “jan seme li lon?”

jan majuna li kute e ni: “mi jan ala. mi monsuta! mi kama. o kute e wile sona mi. o pana e sona!”

jan majuna li pilin monsuta li ken ala toki. pakala! mije li toki: “o pilin monsuta ala. mi o toki tawa ona.”

monsuta la: “*mi lon a!*”

mije la: “mi kin li lon.”

“*a? sina kama tan seme?*”

“mi kama tan weka telo.”

“*sina kama lon poka telo kepeken seme?*”

“kepeken pipi lili.”

“*pipi li lili la ma telo kin li lili anu seme?*”

“lili ala. waso wawa li alasa tawa lon sewi telo la ona li ken ala.”

“*a, waso li lon sike mama taso anu seme?*”

“lon sike ala. luka pi waso ni li suli, li ken len pimeja e ma tomo.”

“*ma la tomo pi mute ala li lon anu seme?*”

“mute a. soweli wawa li alasa tawa tomo ale la ona li ken ala.”

“*soweli li lili ike anu seme?*”

“ike ala. selo soweli li ken len pona luka.”

“*len li pona tawa seme?*”

“soweli li tawa mute li wile lape la len li pona.”

“*seme li pana e len tawa soweli?*”

“waso li tawa lon sewi tomo la luka ona li pana e len pimeja tawa soweli.”

“*a, waso li tawa lon sike anu seme?*”

“waso li kama tan sike li tawa lon sike li ken awen lon sike luka.”

“*aaa! sina toki e len seme, e sike seme, e luka seme! mi ken ala sona!*”


monsuta li pilin e sona wawa mije. monsuta li anpa li tawa weka.

jan majuna li pilin pona. “mije o! sina awen e mi tan monsuta. seme la mi ken pana e pona tawa sina?”

mije la: “lon la sina pana e pona tawa mi. sina pana e mi tawa telo, tawa kulupu mi. pona sina li kama sin lon sina. mi kala. mi tawa.” ni li nasa pona e pilin pi jan majuna. **I**

kalama lili

tan jan Ulansisu
sitelen li tan jan sitelen



pona a,
tenpo pi suno open,
tenpo pi kalama ala.

mi taso li lape ala,
jan ante li lape awen.

telo wawa pimeja li pana
e kon nena,
kin ale li tawa ala.

taso. a! ike! mi kute e kalama tan tomo lape.

seme li mi?

tan jan Alonola
sitelen li tan jan sitelen

mi open lon ma Posuka
taso ma Posuka li lon ala
ma tomo mi la mi ken kute
e pakala e toki mute

mama li pana e sona toki taso
mi kama sona e misikeke oko
taso mi awen oko e utala
mi wile e ni: jan ale o jan pona

mi sona e sona toki la
mi pali e toki wan sin a
toki ni li toki pi jan ali
taso ona li pini ala e moli pi jan lili mi

kijetesantakalu o

tan jan Ke Tami
sitelen li tan jan sitelen



ISSN 2752-4639



977 2752 463 00 6

👋 **Hello!** You're looking at *lipu tenpo*, a magazine written in Toki Pona. Maybe you're new and want to know more about this language. Great! This page hopes to answer some of your questions.

What is Toki Pona?

Toki Pona is an elegant minimal language. It was created by the Canadian linguist Sonja Lang in 2001. It has only got 14 letters and about 130 words.

Why would I learn Toki Pona?

Despite how tiny the language is, it is still possible to describe any concept with it. This might fascinate you. Maybe you just want to take a break from the complex world we live in. Or perhaps you just want to talk to your friends without others knowing what you're saying.

How can I learn Toki Pona, and where can I use it?

There is the official book: *Toki Pona: The Language of Good* by Sonja Lang. It teaches how to use Toki Pona. Sonja made a *Toki Pona Dictionary* too. There are also several free online courses. You can find Toki Pona groups and learning resources on tokipona.org, the official website, as well as on our own website: liputenpo.org. **I**

Do you want to contribute?
That's great! You can join us on liputenpo.org. We communicate in a Discord server.

sina wile pali tawa lipu tenpo la
o tawa lipu liputenpo.org · lon
ona la sina ken tawa ma mi · jan
pali li toki lon ona · sina kama
lon kulupu la ni li pona a ·

All text and images in this document are licenced under a **CC BY-SA 4.0** licence, unless indicated otherwise.

sina wile pana anu ante e ijo pi
lipu ni la o lon nasin · nimi nasin
li lon poka pi ijo ni la o lon ona ·
tawa ijo ali ante pi lipu ni la
o lon nasin **CC BY-SA 4.0** ·